

28 NOV 1997

Cacat-Sokong

GOLONGAN CACAT PENGLIHATAN NYATAKAN SOKONGAN KEPADA MAHATHIR

KUALA LUMPUR, 28 Nov (Bernama) -- Pertubuhan Orang Cacat Penglihatan Malaysia hari ini menyatakan sokongan padu terhadap kepimpinan Perdana Menteri Datuk Seri Dr Mahathir Mohamad.

Dalam satu resolusi pertubuhan itu kepada Dr Mahathir, mereka berikrar menyokong apa jua tindakan beliau dalam menangani masalah ekonomi dan menangkis sebarang cubaan campur tangan pihak luar dalam urusan pentadbiran negara.

Resolusi itu disampaikan Presidennya Mohd Amin Haji Mat Nor kepada Timbalan Menteri di Jabatan Perdana Menteri Datuk Fauzi Abdul Rahman di Jabatan Perdana Menteri di sini.

Sebelum nota resolusi itu diserahkan isi kandungannya dilafazkan Naib Presiden Persatuan Mah Hassan Omar melalui tulisan Braille.

"Resolusi ini merupakan suara hati kami terhadap kepimpinan Perdana Menteri serta penghargaan terhadap segala bantuan serta program yang dijalankan oleh kerajaan dalam usaha meningkatkan sosio-ekonomi golongan cacat penglihatan," kata Mohamad Amin pada majlis penyerahan resolusi itu.

Mohd Amin berkata pertubuhan itu yang ditubuhkan dalam tahun 1964 dianggotai oleh 1,500 orang cacat penglihatan di seluruh negara.

"Selain menjadi penerima bantuan, kami juga ingin menjadi penyumbang terhadap pembangunan negara menerusi kebolehan yang mungkin tidak dimiliki anggota masyarakat normal," katanya.

Fauzi menyatakan rasa terharu beliau di atas sokongan golongan cacat penglihatan itu kepada Dr Mahathir.

"Sungguhpun mereka tidak dapat melihat, namun mata hati mereka sentiasa terang dan peka terhadap perkembangan semasa," katanya.

"Saya akan menyerahkan resolusi itu kepada Dr Mahathir pada masa sesuai dan saya yakin beliau juga akan turut berasa terharu atas sokongan golongan cacat penglihatan terhadap pemimpinnya," kata beliau. -- BERNAMA

AKT NMO